

四庫全書

史部

欽定四庫全書

史部

江西通志卷十三

詳校官監察御史臣周

檢討_臣德生覆勘

總校官知縣_臣楊懋珩

校對官學正_臣翁樹棠

謄錄監生_臣周文彬

欽定四庫全書

江西通志卷十三

山川七

南安府

玉枕山在府城北五里為南安之主山高三百仞兩麓
五峰次第相屬別名五指山宋周元公敦頤嘗遊焉
人明成化中新會陳獻章應聘歸道經此與知府張弼
酬和有玉枕詩話

印山在府治南里許驛使門內舊志有七邱名七星此其一也周遭為池山峙其中如印故名

東山在府治東南二里舊有仙翁菴今為真覺寺小河橫繞山下大河西來相會若縈帶然從寺俯瞰兩城形如合璧也南康縣東五里亦有東山

獅子山在府城東一里如獅蹲踞有清惠泉相傳可以愈疾泉右有龍母祠稍南有大山形最端嚴

寶珠山在府西寶豐門外連五馬山而近城形圓如珠

五馬山在府城西四里水北岸形如五馬圓秀瞰江又上猶縣南門隔水亦有五馬山

五里山在府城南五里山之西有折梅亭蒸髦亭今廢金蓮山在府治北三里諸峰連接狀若蓮花舊志山麓有法華院墨花亭稍上為舞劍臺張弼改名高明所張詡詩金蓮山下高明所燕坐居然見八荒府城西北七里有龍頸山水自石出名曰龍泉山之半石砥如湍

太平山在府城東北十里由下峒入山上有圓坪如涌盤旁有兩山如龜蛇因立真武廟上有泉出石隙瀑流數尋下為龍湫水中一墩自廟視之如浮杯然

西華山在府城西十里石壁如削轉磴而上平行有田有僧院宋崇寧中建後尋圯院前有石澗無魚蝦傳是神龍所遊澗旁一石甚平名釣月臺澗底有臥僧遺跡瀑布凡三十餘丈南有石洞可坐十餘人左有松數千株皆直榦無旁枝又老樹五自地摩空亦無

枝蔓張弼與黎民表陳健等倡和有參差樹影青雲
上遠近泉聲白石間之句

天馬山在府城南三十里梅嶺之東又東有貴人峰

雙秀山在府城東北二十里舊名了山宋知軍黃鐸改
今名兩峰尖削如馬耳山有巨人跡宋棲真尊者塔
西北有靈巖院右折為柳坑有龍湫禱雨屢應明湛
若水有詩

大龍山在府城北三十里舊志云延亘三里狀如游龍

故名左有幞頭巖右折有呆婆巖後有錫坑山又有
仙女梳妝二巖相傳有仙姥挾二玉女棲此

玉泉山在府城東北五十里兩山峙立如門入徑二里
許有泉有菴相傳蘇耽所居冬煖夏涼士人多於中
誦讀

鎮龍山在府城西北六十里四山環列內有坪有溪右
為龍湫舊有龍見故名

天竺山在府城東北六十里山形崒偉林木豐茂與了

山對峙舊有寺今廢東有月峰奇秀特出相近為巘
山界接南康縣和溥水出焉又東北為雲山自下陟
上十里許有菴有靈應泉舊傳此山產桃遊人欲食
者禱之乃許啖一二顆不得持歸

雲臺山在府城西南一百里由石溪村入山最高常有
雲氣盤結盛夏涼沁遊人有衣裘者

南臺山在南康縣南五里山腰有巖可坐十餘人有南
巖寺今廢月夜風籟過客時聞鐘磬聲稍右有山秀

銳而差低名小南山縣西一里西山舊有古塔今存
基址一層

鯉魚山在南康縣東北一里山形如魚又有髻山兩峰
峙如雙髻縣東一里有東華山形家謂之水口山明
萬歷間邑人王事聖創菴其上外甃石為長堤前有
平臺

九日山在南康縣北一里宋陳升之父魏公曾主縣簿
夢山神來謁遂誕秀公因合九日二字名旭後避神

宗諱改名升之登第後復宰是邑築臺其上名曰旭
嶺書臺

獨秀山在南康縣東南二十五里舊名雞籠山峰巒聳
銳下有龍湫禱雨屢驗宋蘇軾南遷過之改今名北
歸賦詩云獨秀江南知有意要三二別四方壺

高靈山在南康縣東南三十里山勢巍峻躡磴而上為
三天門相距各里許門各磨崖鐫字最上有朝元閣
瀑布泉折而左有塔院東數里有勝龍山北出九牛

抵玉潭山為往來通徑山麓有菴曰盤龍晴日登眺
風烟繚繞又東一山名青隱與贛縣武林山相望

龍山在南康縣西南四十里地名鍋坑高三百五十丈
延袤四十里接大庾崇義界

雲主山在南康縣西南一百里高可數百丈形如飛鳥
山上有仙巖巖前有池四時澄澈旱澇無增減山麓
有廟祀黃總管相傳神係唐代人捕賴坑賊遇害者
石君山在南康縣西南一百五十里三石形甚似人中

最高聳為君左曰夫人右曰女郎列峙如相顧然俗名薰嶺接大庾界

玉潭山在南康縣東北四十里地名潭口山濱大江章水流經南埜驛即自此潭東注相接者為鹿鳴山

禽山在南康縣西北六十里俗名蒙山高三百餘丈縣亘百里入上猶縣界

畫錦山在南康縣東北一百里初名大乘山山腰有寺曰畫錦故名即今妙聖寺是也

羊嶺山在南康縣北一百六十餘里山頂有浮屠相傳
唐有郭禪師者居此下山或驅虎豹後以禱雨弗應
積薪自焚火燃而雨隨至人見其烈焰中冉冉而去
因祠祀之

蓮華山在南康縣北一百七十餘里又名巫橋嶺狀如
蓮花上有巖可容百餘人巖前有仙橋橋下有瀑布
千尺瀉於石竇不知所歸南唐時鄉人結寨於此因
名蓮花寨嶺連崇義縣界又縣西北五里別有蓮花

山

飛鳳山在上猶縣西北二里為縣主山高百餘丈軒舉如飛鳳下有萬年觀巢道人居焉

資壽山在上猶縣東半里許高八十餘丈橫亘五里蹲踞如象南山在縣南二里高聳插霄俗有山生角地生鱗舉子成之識明永樂中知縣吳謙建塔其上

吳山在上猶縣東一里相傳邑人有登科者則山下石障必生光彩又東一里為方山形如覆斗一名石臺

西雲山在上猶縣東南十五里元至元間建普照寺旁
有龍井明天啟間知縣龍文光旱禱至井得小蛇納
之瓮中載以入城未至而雨隨注乃以銀鈴繫蛇項
還之井後邑人常見之因名其井曰靈應龍潭

九龍山在上猶縣西二十五里山有九尖峰又西五里
為琴龍山地名琴江下有龍潭遇旱於此祈禱

焦龍山在上猶縣西八十里兩峰對峙中瀉急湍有龍
潭深不可測又西二十里為書山形如書櫃一名太

傳山並峙者為舉嶺

崇山在崇義縣北半里許舊志名旗山一名斗山志勝云後以縣名易崇山縣東半里有大龍山高八十餘丈其麓為策蘭山乃通十八面嶺之路縣西里許有伏虎山如虎飲河有泉流入城繞縣治學宮

觀音山在崇義縣南十里壁立峭絕宋紹興中有鍾行者登山四顧戰慄莫能下因誦經若有白衣人掖之者故名

龜山在崇義縣西三十里形如龜多產茶及水竹其竹節極疏而肉薄可為簫笛縣西南三十里有符水山一名浮竹坳產竹小而輕又西南十里為天臺山大嶂山在崇義縣西五十里形如簾幙延袤數百里前臨絕岸跨以石棧廣盈丈隆數十丈

聶都山在崇義縣西南六十里高一百六十仞連亘四十里舊志云昔有聶姓者開都以聚民故名孫維嶽聶都問荅云字從耳虛也從三耳虛之虛也是山盡

石白質有文作金銀氣其穿在地肺拊之竅皆鳴若
金革虛其至矣乎經稱都者不數見廬江出三天子
都乃在斯流之下注是山也水出章合貢匪彭澤注
揚子而入于海由海上溯危峻若九閭萬派頰首朝
宗焉實惟帝之所都孫說特新錄之以備一解山下
有獅子巖巖西有石田名斗田其上多礬石遠望如
雪有石可為茶磨元有蒙古人宦此琢取過多又琢
白石為礎五十雙載歸自此石變脆質此山本屬大

庾平政鄉明正德間割屬崇義西接湖廣桂陽縣界
傀儡山在崇義縣西南七十里又西南二十里為南原
山其高無極周迴約六十里飛瀑百餘丈下有湫潭
其深莫測明成化間大庾令夏璣躬詣求雨有應勒
碑紀事

筭頭山在崇義縣北一百四十里山峰聳出如聖筭然
九齡山在崇義縣西一百四十里石嶺龍從屏其後九
十九峰峙其前

龍歸山在崇義縣西一百八十里與廣東韶州仁化縣連界深林叢菁土人製茶與普洱茶相似

天柱峰在府城東北五里峰銳而圓參天如柱楊筠松云峰在艮方居人多壽

齊雲峰在上猶縣西十五里勢干雲霄宋謝允昌讀書於此縣西一百五十里有筆架峰縣東二十五里豐江村有雙秀峰縣東北五十里有白塔峰亦名白塔嶺

文塔峰距崇義縣三里許當橫水之去口明萬歷戊申知縣楊邦直募衆建塔且作亭于上

國朝康熙庚申正月十六夜大風墜其塔頂是夜各處塔頂皆墜不獨南安屬縣然也

大庾嶺在府城西南二十五里漢志名臺嶺漢高帝時番君將梅鋗駐兵嶺下因名梅嶺武帝時庾勝築城于此又名庾嶺為五嶺之一其山延袤二百里螺轉九磴而至頂登者難之唐開元中詔內供奉張九齡

鑿開新路始通車馬九齡為文記之嶺分南北是曰
梅關亦名橫浦關上有曲江祠宋淳熙間知軍管銳
多植梅以實其名趙孟邁以嶺下官驛皆梅扁曰梅
花國明成化己亥知府張弼重修嶺路并作均利記
勒之于石

小梅嶺在庾嶺稍西北實與庾嶺聯絡唐開元以前入
粵之路由此故又名小梅關

金星嶺在府治東一里許水口寺左明隆慶間建塔于

上又東一里為惜母嶺嶺下有惜母村

獅頭嶺在府城西南五里左有一山如象與此嶺俱瞰江流循江岸行有石竇頗方廣兩人可並行名曰石門下有一石名曰石門限

莊彭嶺在府城東南十里留地村周二里許接廣東保昌縣界又府城東北十里有駱駝嶺高聳連亘形肖駱駝

白鶴嶺在府城東十四里舊傳蔡仙隱此有白鶴來翔

其麓有蔡仙井清冽不竭

雙童嶺在府城南三十里舊因三峰圓秀命曰三將軍明成化間知府鄧應仁以中峰平似書案改今名

馬嶺在南康縣水南稍東一里延亘橫峙其頂頗寬平形家謂宜於馬首增築聳拔明嘉靖間副使高世彥檄縣傭工累土勢稍昂起萬歷戊午知縣湯有望建塔于巔

峇嶺在南康縣西南五十里龍回村四面峭險攢石磊

硤踰嶺屬信豐界

騰龍嶺在上猶縣治北舊學宮後原名龍歸坑明知府張弼改今名縣東北二十五里有馬跡嶺

大雷嶺在上猶縣北一百四十里地名大雷隘

紅桃嶺在崇義縣東南六十里接南康縣界

雙鶴嶺在崇義縣聶都山右志勝云即雙鶴洞舊名石室洞有井正員廣尺而深不可測相傳神龍居之昔有遊人溷此井龍化雙鶴飛去洞容百人石乳凝結

上如列星下如鐘鼓擊之有聲別有泉名觀音池縣
西北一百七十里有金雞嶺

月子岡在府城東五里形如半月下有月子塘城北一
里鐵岡舊有鐵冶又有五龜岡五阜相並偃伏如龜
青龍岡在府城東北四十里舊傳有青龍見故名太平
寰宇記云有陳蕃子孫墓郡國志云庾嶺有青龍岡
徐道覆欲上大電繞身震雷而止山上有石時放光
明號鏡石

天心巖在南康縣西北四十里巖內通敞有光可坐數十人又以形似獅名獅子巖

梅福仙巖在上猶縣北猶石嶂中相傳有三仙女居此屢著靈異唐時勅封明萬歷初邑人因巖建寺祈嗣皆應巖中泉水甘潔拭目倍明

燕子巖在崇義縣聶都山左白燕羣巢其頂泥落為乳皆成玉故名石如蓮瓣有盤盛之亦名蓮華巖內有丹田數百邱多作角弓狀

歐公峒在府城西十里舊志云山隈石澗多菖蒲間有一寸十二節者有臥石上若竅為槽者俗名劍匣有巨石中斷俗名試劍石

羅漢峒在府城西舊鬱林鎮峒有崖石如門中有石十八排列左右若羅漢然清泉滴注者凡六頂有石梁長丈餘危峻不可度

盧王峒在上猶縣西一百二十里山水雄壯以唐末盧光稠得名

桶岡洞在崇義縣西北一百二十里初為輦洞虔撫王
守仁搗其巢因刻茶寮碑記于石碑凡八行一百八
十三字大四寸許離碑刻七八里鎖匙龍之地有水
自上而下注于石穴深潭形若桶然此桶岡所由名
也詳見劉凝遊記

嫦娥嶂在府城南二十五里峰巒清秀開散如帳幙舊
傳葛洪煉丹其上遺丹液多產仙茅

猶石嶂在上猶縣北二十五里遠望如猶蹲近觀之形

如石簾又名大猷山縣之得名以此後有月巖竅圓如月徑數丈有龍池歲旱應禱又縣西四十里有茶嶂

蜈蚣峽在上猶縣西四十里山峻峭而水深黑前有米洲宋李綱過此賦詩峽云食盡天下毒洲云散為天下食明推官韓統詩宋朝真相曾經過笑插青天霹靂手

鼓樓坳在上猶縣東南二十三里奇秀而高如樓閣故

名縣北九十里有較車坳逕路迂曲如較車然

石壁在府治東一里又名赤壁長八十餘丈瀕章江為舟人牽挽之路明成化間知縣文志貴鑿平之以便行者

迴龍石在府城章江近南岸長數丈背弓起其下空虛如龍踴躍鯉魚石在府城雙壁峽口水中水稍落形如鯉魚洪流新漲第見魚背高圓如籬俗又謂之籬石

浮石在南康縣西三十里高二十餘丈狀如覆鐘水環其外距浮石五里許有寶石雄踞如虎高二十丈連亘五十餘丈因踞實岸名之以與浮對也

巾子石在南康縣北二百餘里高百餘丈橫亘四十五里其巔有巖可容五十餘人內有瀑布泉飛灑而下石形遠望如巾子故名俗謠為君子石

香爐石在上猶縣東二里形如香爐屹立水中

筍石在崇義縣西北一百五十里有大筍小筍雙石峙

立大者高百丈小者差低

章江在府城南門外源出聶都東山流一百二十里過府治東折而南復折而北經南康縣以達贛縣或云出湖廣郴州宜章界故名

港口江在府城東南四十里源出留地坑會赤江東流五十里入章江水淺而清故名

池江在府城東六十里源出南康雲主山流合章江芙蓉江在南康縣南門外章江水流至此澄泓渟深江

之南有平沙橫衍數里皆民居從下行里許入東山
徑有芙蓉港又東十里有芙蓉橋以唐時兩岸皆種
芙蓉故名繞治南而東流折北凡一百二十里至贛
縣會貢水

塘江在南康縣北四十里源自了髻蛤湖二水合流至
長伯里匯為江頗泓深瀚漫折而東二十餘里入三
江口經湖頭會貢水

上猶江在上猶縣南門外源出湖廣桂陽縣流過崇義

界營前彭山水入之繞縣前東流過南康界入章水
或云彭山水即漢志所稱南壩彭水也

鼻吸河在府治西城外源出小溪入濠灌城中歲久淤
塞腐穢居民多疾明知府張弼令歲一挑濬其記曰
南安城狹而長如魚形然故曰魚城西城之下一穴
達濠水灌城中屈曲如魚腸蓋魚之吸水通氣從鼻
土人莫知其故謠曰碧溪河不知既曰溪則不可謂
河也

大沙河在府城南十里源出關頭龍上合小水浦經東
山麓入章江

平政水在府城西南五十里源出廣東仁化縣長嶺流
經城南一名南江亦名橫浦

涼熱水在府城西北一百五十里其源一熱一涼熱水
池圍二丈餘深尺餘流四步合涼水東入章江太平
寰宇記作良熱水謂熱水昔名豫水按猶豫義同豫
水疑即猶江自唐避代宗諱而豫水之名隱矣

深坑水在府城南二十里源出梅嶺北流入大沙河即
庾仲初所謂大庾嶠水北入豫章注於江者也

小沙水在府城西南二十五里源出鼓樓寨東流十里
合大沙河

孤橋水在府城北二里源出北營泉竇南流二里經迎
暘橋入章江

五羊灘水在府城東二里源出鬱村入江有石瀕岸舊
云五仙騎羊過灘故名又東三里為過步灘水水勢

湍急中有巨山突出舟至此人輒登岸步過知府張
弼鑿平之又有樟槎水其源出於章坑東流為大里

水

靈巖水在府城北二十里源出了山經雙牌舖合章江
密水在府城東三十里源出雲山南經小密橋合章江
大明水在府城西南六十里源出崇義傀儡山北流至
大明村口故名

峒山水在府城北八十里下峒村源出黃公坑經石澗

遶洞口之圓山南流出雲津橋入江又有湯瓶嶺下水亦南來與峒山水夾玉枕山脈下作學宮水流合章江

南埜水在南康縣西一名桃水舊志源出紅桃嶺合蓮塘水入章江

吳水在南康縣治東南一名西流水有二源一出大坳頭由合江口會龍坑水經馬嶺而西一出盧源坑由三角廟至東嶽廟二水合而西流橫繞學宮之前又

名六秀水

大田水在南康縣西北四十里源出景泰陽山東流至

南埜口入章江

禽水在南康縣西北源出禽山崇文里東流百五十里
至南埜口入章江相近有過水源出過山東流會南
埜水

蓮塘水在南康縣西八十里太平嶺下源出余原嶺之
麓東流二百四十里經刀石湖至芙蓉江

河田水在南康縣西一百四十里源出至坪里鉛場派
分為二其一界茆坪桑瀾注龜湖而出長龍其一出
新溪逕長龍合為至坪江又經太平里瑞陽江合於
章水

封侯水在南康縣西南一百五十里源出布尾東流過
校溪至石門灘入章江與貢水合相傳梅鎬駐兵臺
嶺兵衆嘗營水後鎬封臺侯故名

猶水在上猶縣東半里源出猶石嶂又縣東三里有造

水出老寨背縣南六里有稍水源出石溪至稍口

料水在上猶縣西北三十里料村源出賴塘坑南流入
章水縣西四十里有關水源出湖南益漿東南流合
縣前江入章水

感坑水在上猶縣東南二十五里源出涼傘峰下有龍
井旱禱屢應九十九曲水在縣東北四十里源出上
坪水流九十九曲

石門水在上猶縣北一百里源出百丈峒東南入章水

聶都山水在崇義縣西南九十里源出沙溪洞巨石方廣丈許厚半之五色如屏立滴水如鐘漏至洗心橋始大此即章水之原而山海經水經所云贛水也詳見邑訓導劉凝遊沙溪洞記

帶圍水在崇義縣城北即橫水也源出大嶂山自西繞城北而會於東溪合上猶江入章水

麟潭水在崇義縣西一百里水竹坑口源出盆漿昔有獸見潭上如麟因名麟潭東北入章水又縣西六十

里有牛皮龍水東流入章水相近有義安水源出玉泉山

西符水在崇義縣東南五十里源出鑊山東流出南康縣南埜口入章水

南原水在崇義縣西南五十里出南原山東流經符江口入章水

潛水在崇義縣西一百三十里源出樟山洞流數里入坑復噴出故有潛水之名殆濟水類也土人謂之鑽

水

和溪在府城東北三十里源出巖山經和溪村合章水
蕉溪在南康縣西三十五里源出鍋坑流至浮石入章
水蘇軾詩蕉溪間試雨前茶指此

鴨子湖在南康縣南水中有堆圓如鴨子志勝云湖水
漣漪邱阜突起湖旁有亭榭平疇周圍多古松喬聳
蒼翠

鎮前潭在上猶縣東一里自猶水分派成潭舊志云有

巨木化為龍遇旱踐以大牛脅以金鼓謂之攪潭水
微動雨即至又東一里香爐石下有妹資潭一名妙
姿以宋甘烈婦得名邑人賴啟詩猶川月照江潭冷
誰為幽魂寫墨香

浸月池在府城內上有亭宋紹興己卯知軍趙衍建呂
行已書額取宋莒公向晚舊灘多浸月之意

放生池在府城東二里宋天禧中置以祝壽自浮橋至
石壁捕魚有禁知軍李大正揭亭其上扁曰好生錄

事參軍趙彥初有記

壽龜池在南康縣治南街白鶴池在縣西今湮又縣東有石綠池宋開寶間偶出石綠尋竭而名不改

天池在上猶縣北三十里小梅嶺之南舊傳漢梅福煉丹處藥臼陷而成池

湛泉在府城東一里廣化院後泉有二左圓右方俱以石甃四時湛然不竭漱石微有聲宋政和間通判閔師文作湛若亭二淳熙戊戌知軍李大正改作湛泉

亭自為記州人繪李像築屋臨泉而祀之久廢明正德間里人張經復建亭其上劉節為之記

上泉在府城東山寺先是山腰蒙川館後有泉前守鑿為曲水僧舍在館之上往往從下取汲有僧性定者向衆云水可下不可上乎乃用符咒曰泉且上來與老僧洗盃其餘出山灌溉逾時僧廚之旁石竇出一水因名上泉又治西五里山下有正泉俗名滾水井里人用以溉田

卓錫泉在府城西南大庾嶺相傳唐僧慧能自黃梅受衣盃之曹溪五百僧追奪之至大庾嶺能以錫卓石泉隨涌清冷甘美衆駭而退泉之右有展衣坪盛盃石又有霹靂泉相傳宋時大旱僧致禱一夕大雷雨泉出于竇故名

涌水泉在府城西南四十里明永樂間居民忽見四山雲霧朦朧因往視之有泉涌出可灌田數十畝甘泉在南康縣西南一里旱澇無增減味甚甘美

白雲泉在崇義縣西門外白雲山下清冽可瀹茗

龜泉井在府城西寶界寺內掘井及泉下有石龜泉從
龜雙目中出宋張九成寓寺中品泉味亟稱之

魚目井有二一在府城西門內一在城西魚背岡府城
形如魚二井為魚目雖旱不竭知府虞文詡立碑記
丹井在南康縣西仙臺觀井有二前後相對如呂字相
傳宋建炎初呂仙寓此與鄧道士開二井自寫遺像
并題詩

蘇步井在南康縣治東蘇步坊下井深水寒其出不窮
玉字井在南康縣東南隅其水清澈玉字街以此為一
點蓋取象形之義

太陰井在上猶縣東南其水甘冽飲之可已瘴癘縣西
北有同心井在宋義士李梓發同心里內

贛州府

賀蘭山在府治西北隅舊名文壁山即鬱孤臺是也唐
李勉刺州時登臺北望慨然曰吾雖不及子牟心懸

魏闕一也因以望闕名臺而北向宋州守趙時逢即臺麓之東北建書舍名一洞天後廢明正德丙子知府邢珣興復之弘治庚申知府何珖移建濂溪書院於其前崇禎庚辰虔撫王之良始遷縣學以書院為明倫堂

國朝康熙庚辰觀察劉蔭樞構亭其上仍舊顏曰鬱孤臺建講堂尊經閣於山下左為宣明樓為清忠祠祀趙清獻抃文信國天祥其東為縣岡坡又東為龜岡

昔建鳳凰臺畔為景鳳山其西北直趨府治尾蟠處二水合流章貢臺舊址在焉

筆峰山在府城東南隅濂溪書院後東接東勝山與夜光山所謂城內三山也

天竺山在府城西四里舊有修吉寺唐元和初僧韜光自錢塘天竺駐錫於此故名宋蘇軾李朴俱有詩今在東門外者非故址

伏龍山在府城貢水東林木陰翳城東十里有鳳凰山

玉房山在府城東南二十四里本名赤石山大石連聳
燦若舒霞中有玉房瓊室天寶六載勅改今名

九峰山在府城西南三十里屹立高聳對崆峒而拱縣
治

席帽山在府城南三十五里山下有黃仙石相傳一道
人乘白鹿從石上凌雲而去

崆峒山在府城南六十里古名仁空山自南康縣蜿蜒
而來章貢二水夾以北馳蓋贛之望山也山麓周迴

幾百里最高者為寶蓋峰面峰有寺明崇禎間太守
劉震榜曰空山精舍寺前為寶鏡池後枕玉屏幃其
巔石類盃孟宋李朴詩有地脈九支龍奮蟄天河一
派練橫空之句

儲潭山在府城北二十里山俯清潭下有儲潭君廟唐
刺史裴諝祈雨感應碑猶存

玉石山在府城北四十五里山俱黑壤惟片石鮮白如
玉太平寰宇記云昔有瞿氏釣山下見二少年皎若

冰玉相謂曰別來此石長殊駛已忽不見石上有冬
桃樹及石杖云昔有引杖擊桃者去而留杖於此又
北四十五里為錦屏山狀若屏張又東北十餘里為
金龍山山接烏兜巖懸崖瀑布溪澗環流為入省之
孔道

西華山在府城東北一百里上有真武殿初自天寶六
載勅曰靈山每月朔日雷火埽殿宇天雖晴亦間有
雷電相近有金螺山舊傳掘土建刹得小石數斗如

螺赤光如金故名上有石佛祈禱甚驗

合龍山在府城北一百里與天師山相接距山十里有龍蟠虎爪二石西接黃竹嶺為龍泉界

龔公山在府城北一百二十里志勝云隱士龔亮遯跡於此今為寶華寺馬祖道一遺跡及勒潭龍井在焉其東北為徧嵒山西南為楊梅嶺天南山山舊有盧光稠驛亭又西為順山怪石萬狀歷三十六坳乃至頂接萬安縣界

黃唐山在府城北輿地志云中有石室石人每丙日輒聞簫鼓音蓋仙靈窟宅也南康記云山角有石子如彈圓或見或隱府志云接萬安界割隸泰和縣

金雞山在雩都縣西三里有穴如石室相傳有金雞出入唐羅隱詩試向溪邊問漁父一宵還有幾聲啼

青釣山在雩都縣東十五里飛淙濺沫自巔而下春夏靈雨瀕江居民每候其聲以避昏墊

柴侯山在雩都縣東南七十二里南康記云漢靈帝時

有劉叔喬避地於此自題其墓曰柴侯之後山因得名

霄山在霄都縣北三十五里高可摩霄山椒有泉歲旱
禱雨於此邑之望山也宋淳熙中周必正為守禱雨
而應立廟其麓嘉熙中必正之孫名頌者復令霄修
廟而記之明邑人袁淳有仰霄山歌又西北為太平
山瀑布幽蘭供人遊賞今建太平宮觀于上

峽山在霄都縣西六十里兩山對峙袤亘十里貢水貫

其中南康記云夜光遙見若火從峽汭流十里至蛟窟而沒唐天寶時勅改為夜光山山下有路今為通贛便道

左坑山在雩都縣西南七十里山下有龍湫禱雨靈應固石山在雩都縣北一百里一名展誥山宋岳飛平彭友處又東北為御屏山宋時議立巡司今廢

高沙寶山在雩都縣東北一百里三峰品立宋時有樵者見白兔入穴掘之銀鑛溢出故名又東北五十里

為禁山與張家山相連東望寧都西瞻興國南眺雩都昔人有禁曰彼此無相侵擾今仍其名又東北三十里為仔童山

南山在信豐縣西南里許與攬秀亭相望左枕花村右襟桃夢登麓遠眺可盡一邑之勝

縣山在信豐縣東三十里縣水出焉折而前有峰曰鳳凰石又東十里為小假山勢如列戟上有龍湫旱可禱雨又東十里為武山上有天池周環皆石雨後瀑

奔澗湓輒有松子浮出多至盈斗舊傳唐武氏之族
避地於此其麓為竹村舊志別載竹村山者誤

禾溪山在信豐縣東八十里怪石峭峻下有溪流蔭田
可數千頃又東二十里為衢字山麓有溫泉嚴冬不
改北為河田山縣延數十里與安遠縣接壤安息水
出焉

金鐘山在信豐縣南四十里上有二石筍一高數丈其
前為羊馬石石磴數十級四周如墉中平如砥可容

數十人又南為三明山三峰鼎峙石塔五層井泉激
泓不竭舊傳王道人結菴於此明邑人俞慶築書堂
自呼三明山人尚書歐陽德司業景暘俱為之記

香山在信豐縣南七十餘里九十九峰有小溪十八道
出龍湖口多產藥物志勝云昔人見百鶴翔集各止
一峰一鶴無所止羣鶴復飛去巔有哀道人巖深廣
可坐數十人道人賣藥市中夜則宿此一日忽去書
萬山哀道人造巖住八字於石墨跡猶存又南為黃

柏山有龍湫可禱雨又南二十里為聖山高插雲表
石坪廣數十畝文如九宮八卦奇三偶四具見造化
之巧又南二十里為龍平山俯瞰梵石灘上有照鏡
石圓逕二丈許明淨瑩白

壺山在信豐縣南一百八十里有寺名大龍山舊志誤
以寺名山頂有天池土人往往迎禱於此有巖數十
多產紫草藥物嘗見異花開如白蓮相並一山差小
為小壺峰又南二十里為鳳湖山

穀山在信豐縣西三十里堆螺擁黛多產翠雲草九域志云山下地名穀田因以名山頂有池產五色鯉十道志云南康有五色鯉即此有廟祀晉九江太守蔡率今廢為寺寺南十五里有芙蓉巖距縣西南一百里有古株山

木公山在信豐縣西一百里上有天池廣數畝土人六月六日祈穀於此十人至池內可取十魚百人可取百魚如數則止不能多也又西二十里為猶山舊志

云上分九十九面多產異藥

廩山在信豐縣北三十里豐崇如廩或曰唐改縣以此山得名明主簿李奉朝與賊戰歿於山頂即瘞而墓焉俗呼為主簿腦山與南康縣接界

龍新山在信豐縣北一百五十里一名青龍山普濟禪師卓錫之地塔今存其寺曰新龍舊志誤以名山

靈山在興國縣東十五里即南康之玉山為宋趙清獻題詩處有象鼻石筍石鐘諸峰方竹徑芭蕉洞滴珠

匹練二泉半壁一竇中石像趺坐俗謂飛來佛寺名
龍華宋時鐵船僧自廬山來面壁於此明永樂初知
縣唐子儀有重建靈山寺記相近者為金斗山自趾
達巔無寸土其斗絕者鐫石為級以通行人有盧公
巖舊傳盧禪學佛於此或曰盧公冠巖所嘗遊也泉
仰出石上暑暍不涸背為瀧石洞出紅石凡鑿石為
柱礎碑坊者需用焉

方山在興國縣東北四十里方泰以此名鄉山頂出雲

城中輒雨諺云方山戴笠滿街著屐

上洛山在興國縣西南四十里西京雜記云上有石墨
可書太平寰宇記云山中多木客乃魅類言貌似人
能斫杉枋與人交易嘗就民間飲酒為詩云酒盡君
莫沽壺傾我當發城市多踞塵還山弄明月

崖石山在興國縣東八十五里絕壁萬仞縣亘數十里
相傳文丞相天祥屯兵於此後有登者獲鏡與寶劍
而歸又縣東一百四十里有蓮花山亦屬丞相駐兵

處

覆笥山在興國縣北八十里雲牕私志云昔涓子發石
笥得秘書十二卷因以為名山高二十餘里東望金
精西望芙蓉北接青原南瞰章貢為一邑羣山之宗
舊傳上有平湖周數十里湖中石雁每至秋天飛鳴
應候又有古祠多靈草異物今皆荒蕪惟兩泉泓然
紗帽峰馬鞍山諸勝錯落於南崖間而已

大烏山在興國縣北一百三十里最高處有登天坊三

仙殿皆東嚮吉水鄒元標顏曰重蜡報功山高二十餘里四更觀日出朱九瞳矐三躍三按乃上昇石穴二名風洞雨洞深不可測北眺吉州城郭犁然在目又密石砦有山名小烏以景從大烏為義

翠屏山在寧都縣東二里一名吳峰山勢蜿蜒界梅江而止下有長春谷宋邑人胡塾讀書處又東一里為石華山松盤山頂如石之華上有仙子廬又東五里為雲蓋山

武頭山在寧都縣東四十里脈發自閩盤亘數十里南
康記云宋孝武大明中有至其巔者見池廣可百丈
水色如丹旁有顆粒如珠光麗再往竟失其所山之
文曰珠湖三峰原名虎頭以避唐諱改今名

金精山在寧都縣西十里峰頭皆石望如陣雲為邑西
鎮山道家第三十五福地中有碧虛洞初入兩崖壁
立中通一徑名一線天至望仙峰俯視城郭村落如
綦布下臨洞口相傳吳芮所鑿舊志云漢張世女麗

英年十五入山得道長沙王吳芮聞而聘焉麗英弗
許乃昇高紿曰山有石室中通洞天能鑿之當相見
芮大發兵攻鑿既通見女乘紫雲半空語曰吾為金
星之精降治此山言訖而去山以此名奇峰不可枚
數其著名者凡十二曰蓮花合掌仙桃凌霄黃竹披
髮望仙三巘伏虎翠微瑞竹石鼓詳見宋曾原一金
精山記

果盒山在寧都縣西北十里四面皆崇山長松交蔽雲

日中通一徑周圍石欄俯視懸崖如在天際上有清
虛觀明崇禎間周道人煉丹於此相近者為金牛山
奇峰峭壁環繞二三里又有官人山唐季黃巢之亂
官吏避兵於上

東華山在寧都縣西北二十里飛瀑雷轟隔澗為甘泉
巖又有暘挂山其頂曰天紫窠下繞桃溪山址皆田
園村落日光反照掩映如畫因名暘挂又西北數里
為桃林山徧山皆桃雜以佳卉茂竹有梵剎藏佛牙

出舍利光其下有泉曰過夏遇僧解夏則涸右為龍湫能作雲雨

濛山在寧都縣北二十五里山間雲氣濛濛懸崖飛瀑頂有巖濶可丈餘前為戶牖石牀石梯不假斧鑿而成又一巖容百餘人其餘巖穴大小各極其妙相傳東晉時里人賴箕廬此元曾郈有記

團箕山在寧都縣南九十里界連瑞金石城二縣

中華山在寧都縣北九十里上有四季梅花結子至十

月方熟下為陳御史勉故里

凌雲山在寧都縣北一百三十里高數百丈與大名山相連蜿蜒數十里左右石峰插峙下有龍湫其深巨測涓滴有聲曰衙鼓峒峒中有蟄龍投鐵觸之風雨立至相傳上有漢高帝祖墳故建漢高帝廟於山麓明董文禧越有詩韓其誣然疑為南漢劉氏之祖則龔之先世屬上蔡人與此地亦懸絕也

明山在會昌縣河北里許為邑主山巨石雄峙如屏障

山坳有半山寺寒泉飛瀑冬夏不竭其麓有六祖寺
下為五湖北折而西為西山巖宋尹天民讀書處
古方山在會昌縣東十里高壓羣山為一邑之壯觀
芙山在會昌縣北八十里秀色如天插芙蕖高四百五
十丈周迴數十里

羊山在會昌縣西一百里舊傳有張十郎祠祀以活羊
縱之不去虎亦不傷縣令余文震遷廟於仁峰其羊
化為石

紫雲山在會昌縣南一百里高數百仞鑿石磴四百餘級名雲梯石西折為趙公巖又南二十里為四望山東界閩南控粵清秀如畫距山十里有萬丈石壁立如屏

盤古山在會昌縣東南一百二十里周圍石壁亦號盤固山有羅漢巖容數十人池廣一畝產白蓮有寺曰智門相接者為君山述異記云中有玉臺方廣數丈周迴盡白石覆如屋四面多松杉一名媧宮亦曰女

姥石每風雨後聞鼓吹聲山魃木客為之唱舞

欣山在安遠縣南十五里太平寰宇記云凡十有二面
高五百丈有石巖蓮池巨石如牀產異竹丹橘

員華山在安遠縣西十五里孤聳員平有僧遊此得清
泉易名源華

馬鞍山在安遠縣東南三十里相近有虎巖原名小池
巖虎嘗數此明季僧青山居之虎乃去又五里為熊
嶺

鐵山在安遠縣北六十里宋置鐵場今廢又北十里為擢秀山有茂林飛瀑之勝又北十里為罐石山在長河保萬仞崔巍峭壁如畫

國朝順治初年居民築砦以避寇又北十里為嚴陂山上坦下險東有石洞幽奇可翫又北五里許有香山其形似象隔江一山如獅名獅象水口越二里即會昌界

陳石山在瑞金縣東五十里舊志分注水巖羅漢巖為

三今考之乃一山也有巖深廣十餘丈由試劍石蠟燭峰而入統志云陳武帝徵時嘗廬此故名羅漢巖以伏虎禪師著巖上懸石若龍有泉下注因石為簷雷下施柱礎曰六和精舍堂有水簾旁有玉峽滾球泉循巖折行有將臺點兵寨內有劍門九曲洞三層臺石竇石鼓石窓石梯外有天柱巔有龍湫

雲龍山在瑞金縣南五十里其山純石約高十里泉竇甚多遇旱不涸有南北二門最險鄉人避亂多構屋

其上頂有寺曰應雷石壁有雷書篆字又縣南四十里有螺石山形如螺亦如伏龜如躍馬

銅鉢山在瑞金縣西北五十里相傳僧開山時掘地得一銅鉢山因此名高十五里雲氣常羃其頂下有龍井井中有石如龍爪禱雨見爪多應上有昭靈王祠凡八景曰騰雲石香爐峰筆子峰七星堆古龍塘金盤坳仙人湖及龍王井也

瑞雲山在瑞金縣北六十里即陳輦地中有瑞雲洞前

後二門中分為兩高七八尺壁有竇燃炬可入莫窮所際

水謁山在龍南縣南七里峙渥水中今名浮杯山

金盆山在龍南縣北二十里山南一池曰張天塘流注

山頂四時不涸又南為龍山有龍湫又南為將軍山

上皇山在龍南縣南三十里有古菴曰上皇因以名山

形華山在龍南縣東四十五里羣峰競秀迤邐為三仙

山三峰參列狀如筆架中間平曠隱若布局名三仙

關亦蹊路峻仄若升梯然俗又呼梯子嵎又縣亘為
七友嵎山勢層疊分而為七山下兩水夾流是為濂
水

歸美山在龍南縣南一百里一名龜尾一名神闕高百
餘丈有自然石城左右石峽如雙闕山產水晶果以
與龍山對故謂之龍頭龜尾又南二十里為小武當
山渥水出焉石筍九十有九列如矛戟飛鳥不能棲
縣延為南宮三門角子諸山

冬桃山在龍南縣西南二百里上多桃樹經冬始熟下有溪流是為桃水冬桃隘在其上東抵廣東惠州和平縣南達廣東韶州翁源縣西距廣東南雄府始興縣志勝云踞險當關更番戍守可制三面

琉璃山在石城縣東五里舊傳秦末有劉華者家其上其女忽拾異果啖之得仙一名仙姑嶺

寶山在石城縣北三十里兩峰如圭又北二十里為樓蓋山舊傳楊真人煉丹之所有石几石牖午夜嘗見

燈光或云許褒許國讀書於此又北十里為牙梳山
北近廣昌東接福建寧化縣界有三十六面元延祐
初蔡五九熊長腦據為巢穴山有鷹子岡琴水所自
出也

三臺山在定南縣南隔溪三峰橫列中一峰特起下有
印山縣東有文昌山高出城垣舊建亭曰仰高久廢
明萬歷間知縣章瑩復之題曰山高水清縣西三里
有西華山

白雲山在定南縣東三十里其高百仞明隆慶初土人
建菴掘地得石題曰白雲深處宋淳熙二年勒遂以
名山

劉峯山在定南縣東北一百里與廣東龍川縣接界

項山在長寧縣東南五十里閩廣之交有雙峰飛瀑之
勝縣南五十里有盤龍山上有流泉古松十餘中藏

梵刹

寒地山在長寧縣東五十里林木蓊鬱紆迴二十餘里

中有村落盛暑夜如深秋故名

帽山在長寧縣西七十里一名大帽嶂盤亘百餘里舊為葉冠巢穴稍南有鈴山高聳秀拔為黃鄉羣山之冠

官谿山在長寧縣北三十里棘箐叢深昔為盜藪至今天雨陰霾嘗有鬼物嘯呼

佛日峰在府城貢水東舊有塵外雲端駒巖一憩吸江五亭俱廢近復構塵外亭其下為馬祖巖相傳道一

始欲棲此一夕鬼為築垣歎曰學道不至乃為邪鬼
所測因棄去居龔公山

了髻峰在府城東南六十里又城南七十里有四會峰
東距龍江與崆峒山相對其上方平容數百人旁有
小徑可躋井源不竭宋元人每避兵於此相近有文
秀峰突立平田中高百餘丈城北八十里有南高峰
舊名吼嶺踞錦屏山之南高可十仞

秦娥峰在興國縣西四十里舊傳唐時秦娥自楚來虔

得道能興雷雨一曰古孝女也土人祠之山腰為君子嶺

白茅峰在寧都縣西南三十里蓮花山左上生白茅下有龍潭四時常吐雲氣又有龜湖亢旱不竭縣南五十里有圭峰右臨梅水左瞰琴江兩石前垂如乳

東陽峰在寧都縣西北十五里高峻插天山腰橫濶二里種植果樹有泉名仙液南唐時邑人衷愉結廬奉母隱此為靈巖觀舊志載有木鐘金精山木鶴鳴

則鐘應之又縣北二十里有君子峰形如卓筆亦裒
愉讀書處也

仁峰在會昌縣西一百里舊傳有石室石臺祀張賴二
神臺旁有竹一竿風來則偃而拂之其室故清淨無
塵石竅中泉水不竭飲之可愈疾

東峰在安遠縣東二里峰巔尖秀如文筆

鷺峰在瑞金縣南五里宋建炎時劉十六郎兄弟從岳
武穆破峒賊倡義於此六峰在縣西三十五里環拱

若城郭巖壁玲瓏縣西北二十里有寶蓋峰相傳黑
龍攪地成溪今濁溪是也又縣北五十里有齊雲峰
高陵峰在石城縣西三十五里重岡複嶂蜿蜒十數里
與苦竹嶺石門山相連

金圭嶺在府城西坊與獅姑桂家田螺百家為城中之
五嶺城西五里有佛嶺舊名西隱山雙阜突起有亭
介其間一曰御風一曰大觀今俱廢

文潭嶺在府城東三十里太平寰宇記一名昇仙峰巨

石盤亘下有潭廣數十丈深不可測舊傳漁父於潭中得大小銅龍五今存其四又東十里為回軍嶺舊傳黃巢兵過里人方氏率衆却之又東五十里為馬頭嶺其上有石佛

分水嶺在府城北一百二十里為贛縣萬安之界

慈果嶺在雩都縣南三十五里稍東逆折為堯塘三嶂又縣北三十里有長布心嶺山下地形長若匹練

嶠嶺在信豐縣西北四十里南康信豐於此分界嶺有

怪石其上有巨人跡

蕭公嶺在興國縣東接崖石砦對峙者為豬嶺牛嶺密林叢菁路極險距三十里為胡公山陳謨詩所云前登胡公山似螳緣壁度也

梅嶺在寧都縣北一百三十里界連撫州建昌梅水發源之處環山有梅故名漢元鼎五年王溫舒征東越出此邑人邱成和作梅嶺考

桐嶺在會昌縣南五十里山徑稍平為閩廣通衢

打鼓嶺在安遠縣南十餘里頂有石鼓石槌鼓旁二石人對立邑譙樓鼓鳴輒應之後斷石人手乃已

黃竹嶺在瑞金縣東北八十里路通福建汀州

程嶺在龍南縣東五十里界接定南又縣西北六十里有峰門嶺其上山路如門

白水嶺在石城縣東北四十里又名東華山與福建寧化縣接界絕頂建二仙祠每歲雷入輒作數日腥臭又有遙嶺周迴皆石峽小峪出峪數里為巖前嶺

神仙嶺在定南縣北四十五里有仙人題字石漫滅不可辨識山巔石礎石盤行人或見火光煜然

登豆嶺在長寧縣北四十里又縣南五十里有丹竹嶺雷岡在府城貢水東本名火燄山一夕為雷雨開通元參政沁布阿咱爾建亭曰雷岡明成化間知縣何文縉正德間知府邢珣重修萬歷庚寅虔撫王敬明植松於上改名萬松亭又曰水雲深處距府城二里有社岡舊傳社日里人於岡上祀神會飲

鳳凰岡在府城北六十里宋治平間有雙鳳鳴於上
九日岡在信豐縣西廂外二百步勢如覆釜平曠可坐
百人為重九眺望之所縣西南六十里吉錢岡土色
赭紫而圓若小錢之累疊

華林岡在瑞金縣西三里至七堡止約長十里許
馬蹠岡在長寧縣治南環繞西北其下有馬蹠岡

通天巖在府城西二十里空洞如屋有穴透其巔怪石
環列如屏宋秘書陽孝本隱此人呼玉巖翁有祠在

馬東坡詩鐫石上其半壁曰忘歸巖明王文成有詩
穿心龍虎翠微諸巖皆在其處

獅子巖在府城東北十餘里石壁峭拔高數丈深倍之
遠望其狀類獅內有元代所建佛殿三間

羅田巖在雩都縣南五里一名善山兩旁巖岫空洞交
通宋嘉祐間周元公敦頤倅虔遊此賦詩縣令沈希
顏因建濂溪閣明邑人何春更闢觀善巖王守仁為
之說巖西有別一洞天其左曰仕學山房巖壁有岳

飛文天祥題句縣東五里有靈泉巖瀕江立石水從石出味色絕佳一名出水巖

斗巖在雩都縣南二十里前有小阜七因名頂有梁仙古檜又南二十里為需巖上下兩穴宋孝廉王鴻隱此又縣西南三十里有康石巖內五洞土人傳有飛仙舊跡縣西四十里有龍巖地名白雲嶂三洞嵌空玲瓏各可容百餘人石乳垂垂五色絢爛叩之鏗然作玉磬聲又若鼓聲溪流貫注出石龍口邑人袁淳

題曰洗心上曰白雲巖中曰太虛巖下曰龍巖

鐵石巖在信豐縣南金鐘山志勝云巖有二門相對空
洞窄豁舟行望之瑰詭層疊舊有鐵石打金鐘之謠
又前為石井龍巖巖上有龍爪跡歲旱禱之鳴鼓則
泉流涓涓鳴金則溢涌矣

三台巖在興國縣西里許三峰蜿蜒有放鶴看雲二亭
故址頂有真武壇越里許為江東祠祠前古檜二株
纓絡翔舞明初呂太常復兄弟與泰和陳謨為茅亭

倡和府志稱榴岡翫翠亭水石淙然有聲並是其處
詳見劉崧遊記

東龕巖在興國縣東北八里相傳為唐越國公鍾紹京
讀書處巖前有試劍石中裂欲斷上有飛泉下垂如
練兩旁壁立不可徑水流石罅間通小舟巖中可坐
數十百人所謂龕也面一峰奇峭如筍怪松異卉交
其上一石如舫倚其旁巖水由靈湖來有巨鯉帶銅
環云是紹京所養元提舉滕賓有東龕十景詩

雙龍巖在興國縣北二十里兩巖深廣可容數百人巖頂平敞處號仙人棊盤其旁竅可偃僂而出俗名通天巖

國朝康熙己丑知縣張尚瑗以巖對臘石砦諸峰大小三十六合於嵩陽之數改名對嵩巖縣西北四十餘里有定光巖泉出石上東南有小邱五六形如覆盂尚瑗以敦邱名之鐫字石壁邑人曾先慎有記

飛泉巖在寧都縣西北十五里邑人盧達所名泉如匹

練自山巔下注其上有集賢巖廣丈餘建有佛寺又數里至方竹巖多生方竹縣北百二十里有盧穆巖崛起千仞山腰石戶如瓮廣袤十丈左壁一室持炬從竇入深廣半之頂有泉甚清冽相傳唐盧穆盧華於此仙去足跡猶存

蕭帝巖在會昌縣南一百里狀類獅伏而口仰張中虛可容百餘人有憑虛閣石闕石倉諸勝相傳齊武帝避難處九域志云梁武帝微時讀書處南史云蕭蹟

率部曲百餘人於此起義因名焉皆沿譌而未可盡
信又南二十里為漢仙巖去羊角水鎮二里舊名漢
山峭峻拔雲下臨漢溪石竇僅可容人匍匐而入中
有秦王讀書臺石龍數丈蜿蜒如真枯木一枝橫挂
絕壁俗謂仙女燒香風雨不蝕中建圓寧菴樓臺參
差依石高下泰和郭子章顏曰虎頭羊角之聚其勝
景如鷹蹲僧帽蟾蜍諸石玉笋天竺二峰月鏡臺金
剛窟滴水汜白龍漱石隙泉石獅石龜笏碣仙人弈

處不可殫述南康記云可比閩之武壠非虛譽也

駐米巖在會昌縣東三十里深廣二丈許伏虎禪師駐錫處俗傳有小竇日出米隨多寡可給後人鑿之米遂絕今僅有泉流亦名注水巖

蓮花巖在安遠縣西三十里兩峰壁立中藏一洞旁有石龕二石塔一飛瀑從巖頂懸注入溪澗中

月圓巖在瑞金縣西四十里地名黃安巖深廣容百人志勝云巖狀如魚橫澗十餘丈前有二潭曰龍曰龜

容光所射玲瓏清冷宋天聖中邑人鍾法明結廬其
頂賜額月圓因名皇恩巖縣西北五十里有九仙巖
地名密峽口深廣凡三里舊傳有九道人於此乘金
龍去

玉石巖在龍南縣東北五里巖有三曰下巖上巖新巖
舊有玉跡寺以旁有巨人跡故名宋太宗賜書百二
十卷依巖建閣藏之治平間賜額普和寺今廢明正
德間虔撫王守仁征泃頭凱旋憩此題小篆曰陽明

小洞天鐫碑於壁以紀功巖後一小竇曰鞠躬門知
府邢珣所鑿列炬入有石形如狻猊經一線天有龍
井以石投之作鐘鼓音由下巖歷上巖境皆幽冷新
巖在南洞凡六七視二巖尤勝

松林巖在龍南縣西南八十里寬曠可居中有石佛三
雕刻如新凡旱澇疾病有禱輒應背有三峰卓立半
壁開一圓竅相傳時平聞鼓樂聲將亂則聞鉦角聲
五龍巖在石城縣西五里西華山之麓志勝云唐貞觀

中採樵者見五叟笑語巖中即之惟見五龍交戲潭中耳

通天巖在石城縣南十五里深若廣厦洞中一竅通天鳥道盤曲而上頂方平若原石壁數十丈酷肖龍鱗有泉清冽釀酒較他水馥烈元至正末陳友諒餘黨踞此為砦又南二十五里為洪石巖狀如伏猊攀磴及頂入石門寬敞平豁舊有夾道長松今斬伐殆盡圓對寺辨嘯亭倚巔而立石泉一泓轉南為獅巖又

十里許為滴水巖

青龍巖在長寧縣南三十里大小十餘穴清流縈抱佛閣凌空陟降必由棧道

黃石洞在信豐縣西南八十里高數十丈有石人作兜鍪按劍狀後有石獅象距左右又一洞深險人跡不能至懸崖飛瀑噴濺如珠

竹管峒在興國縣北八十里地名三陽礫叢篁萬頃三十餘里無雜植民舍皆以竹為之

青陽洞在寧都縣西北十里清溪泛湓循洞口入澄潭可鑑巖下建有佛殿上為騎龍岑鑿石磴懸梯而登結屋二三家洞底鐘鼓聲徹山頂

油瓶山巖洞距龍南縣南三十五里左鐘右鼓亦名鐘鼓巖隔江三石筍森立相向

青雲嶂在雩都縣東南七十里積翠浮空頂有梵宇縣西北十五里有古木嶂與烏石山夾溪而峙

九龍嶂在安遠縣南十五里上有龍潭者九旱歲應禱

下有獅子石高百丈一石差小亦似獅相逐

龍鳳嶂在瑞金縣東三十里即龍霧山也諸峰相連若龍飛鳳舞上有仙女池旁有碁盤石傳是後周謝仙翁採樵得仙處縣西二十里有橫山嶂

烏石嶂在石城縣西五里巖石斗豎如屏凌晨雲罩至午方散縣南三十里有丈夫嶂頂曰仙桃巖石之類桃者頗多嶂之下為宋陳邦光舊宅又有夫人嶂以邦光妻魏氏得名

華竹嶂在定南縣東七十里與院逕山相接嶂下有水
莫知其源山田悉資灌溉

鳳凰嶂在會昌縣東北四十里兩山夾峙如翼

涼傘嶂在安遠縣北八十里聳入雲表接信豐界

雲蓋嶂在長寧縣東北十餘里雲氣幕歷四時不絕縣
東南十里有蠟坑嶂峰如卓筆縣東六十里有馬戰
嶂接福建武平縣界

寒信峽在雩都縣東北六十里與車頭嶂臨江對峙每

歲峽中先寒故名俗謠為韓信峽

余侯峽在會昌縣北一百里兩石夾峙江流迅激相傳
有余侯得神龜於此無何龜亡侯亦卒葬峽旁土人
立廟祀之縣南一百二十里有鴈門峽夾江兩岸皆
高山中列三石江水分為三道又號為三門峽舟行甚險
馬頭石在府城南三十里信豐江口水中突起如馬首
螺亭石在府城東七十里述異記云貧女採螺為業暮
宿此亭為衆螺噉其肉死焉殯其旁冢化為石螺殼

無數又東十里有噴龍石兩岸劍立飛淙注下為龍湫漢郡國志唐十道志及南康記皆云中有鰓鰾底人動之風雨立至晉咸康中始建祠宋紹興七年賜額潛靈州守直閣陳韓禱雨而應奏請勅賜其神為廣潤侯勒碑紀績

國朝康熙丙子贛縣知縣曹炯旱禱得雨重新其廟榜曰霖雨蒼生

仙女石在府城北四十里上有仙女祠蠶者禱焉又北

三十里有虎面石黑斑如虎文又北十里有石人石
相傳宋州守劉彝舟過水涸灘高榜人甚難之夜夢
石人語曰劉賢侯也吾當護之詰朝解纜即下灘

龍門石在雩都縣西南一里下匯澄潭夜有紫氣濛濛
騰霄歲大比或聲裂如雷俗謂龍門開必有掇巍科
者縣東南五里有羅石鄉人結寨避寇號羅石寨縣
南十里有寬石高平直矗亦可避寇縣西十里有丈
鼓石上建浮圖又距縣二十五里有鯉魚石瀕江色

赤狀如游魚

響石在信豐縣南一百里石廣丈餘高數丈與人聲相
答又寧都縣虎溪中亦有響石能與溪流聲應如洪
濤然

三峰石在信豐縣西南一百里三峰屹立如筍石戶北
向舊傳戶內有二竇通於兩峰窅窈明曠縹緲流聚宿
不戒於律一異人過而叱石石閉羣僧殲焉祇留一
龕可容數人又巫山有黑松子石凡三十餘率高數

十丈

羅經石在興國縣東簾幙嶂前石上隱然具子午篆文
故里人多習形家言

虔化石在寧都縣西五里舊傳有虎化為石因字文相
類更名虔化避唐諱也又西五里為冠石由長庚橋
西入環山麓皆植茶樹有一石上高下平若進賢冠
又名紗帽峰南昌林時益結廬居焉所製林芥香味
第一

螺石在寧都縣南十里秀峙梅江狀如螺旋對峙者為
雲石巔廣百餘丈有天湖宋大明中人見蛟犀出沒
焉

魚潭石在會昌縣南三十里石立江澚昔遺老周伯綸
釣於此今潭淤塞又南八十里有雞鬬石兩石相距
春水漲時舟行者多戒心相近有聖姑石瀕江如人
形篙師過必擲石以卜吉凶

片雲石在安遠縣西六十里舊名版石高廣十餘丈版

石堡緣以起名

貓頭石在瑞金縣西四十里三面俱險一面坦平避亂者構屋其上

天馬石在石城縣南十里小馬爭前大馬次之首尾鞍勒其石一一酷肖縣北有華蓋石狀若麾蓋一名錦繖石

贛江在府城北章貢二水之會處北流三百里至吉安府萬安縣其間有險灘十八屬贛縣者凡九曰白澗

天柱小湖鼈大湖狗脚銅盤錫洲梁灘

桃江在信豐縣東源出龍南冬桃山北流入縣界納黃田江東鄉江諸水流過烏漾灘入贛縣界烏漾石峻舟楫難通明季始鑿平其外又有枯木三摺梓木石瀨龍江圓潭上寒下寒上智咽人三港下順劍門車輪斷龍諸灘

潁江在興國縣東北一名平川其源有七出自桐林埂及蜈蚣山者最大西會潁水西北會黃田水流二百

六十至平固江口入貢水

白沙江在寧都縣南二十里源出武頭峰麓南流會上
團水自石城豐義至中團歷松湖入梅水

章水在府城西漢志名豫章水自大庾縣東流折北經
南康會上猶水至府西環城而北於龜角尾合貢水
貢水在府城東漢志名湖漢水源出福建汀州新樂山
西經瑞金南過會昌北會雩都寧都石城興國信豐
諸水流至府城東環城而北合章水

長步水在府城西北四十里源出黃家山過長村下蕩
至水口流入贛江

桂源水在府城西北雲泉鄉自麻口經行龍下市至攸
鎮入贛江

東韶水在府城東愛敬鄉源出雩都西北界之九山歷
東韶會西溪流入潁江

梁水在府城北一百六十里贛與萬安分界處發源龍
頭嶺合鷺溪黃塘諸水出梁口入贛江

雩水在雩都縣北三十二里源出跌爛水繞東溪即漢灌嬰始建縣治地經雙橋入貢水

筠竹水在雩都縣西南八十里源出高障山北合雩水
化龍水在雩都縣西北五十里源出雞公山西南流入
貢水渡水在縣東北一百二十里源出龍山南流會
曲陽水入寧都水曲陽水發源曲陽山距縣治一百
九十七里

寧都水在雩都縣北一百七十里源出寧都縣境南流

合散水質當黃沙長樂諸水入貢水上流有灘十二
曰葛灘八賴井洲鷓鴣藥口大傳車頭小萬苦竹長
灘率口牛牯

縣水在信豐縣東三十里源出縣山至烏口入桃江又
東十里為巫水源出巫山至樟塘會龍湖入桃江

西河水在信豐縣西百餘里源出猶山東流自南折北
至城下入桃江

滅水源出興國縣北覆笥山有二派其西北流者經廬

陵復歸縣境入贛江其南流者至縣北門外合潏江
受早禾田嚴坑諸水凡五派

虔化水在寧都縣西五里一名虎陂舊縣以此得名

梅水在寧都縣北百二十里源出梅嶺至麻源丁坡會

黃土嶺諸水至洛口與安樂新吉密石諸水合是為

東江

清音水在寧都縣西北百二十里至羊灌渡與潭口水

合是為西江

湘洪水在會昌縣北七里合縣湘二水西北過雩都流入貢水深不可測蛟蜃居之其灘曰老虎湘洪北洪豬肚羊角羊角灘長二里中有穿針龍鉤背倒鬚諸石最險迅又西曰鷓鴣洛口愴惶龍化上橫下橫梁洪梁洪灘長五六里中有九曲舟人畏焉

軍山水在會昌縣南二十里源出雁門峽流入湘水

羊角水在會昌縣南百二十里舊名郎溪東達福建武平縣界南達廣東程鄉縣界為會昌襟喉湘水發源

於此

濂江水在安遠縣南門外繞縣治西北會欣山上濂里仁小華江諸水流至板石始通舟楫

三百坑水在安遠縣南四十里源出三百山二十里至石口十里至太平保納符山水四十里至楊家砦二十里至石頭山入定南界納劉畚水入廣東龍川縣界

縣江水在瑞金縣東南源有二一出福建汀州白頭嶺

卷十三
一出縣東北陳石山龍池流五十里至縣前合貢水
又合烏村智水銅鉢山瀾水羅田浮圖水流經會昌
雩都繞府城入贛江

渥水在龍南縣治東南源出小武當山會上皇諸山之
水至城北匯為三江口

瀟水在龍南縣東源出程嶺與定南分界至城北出三
江口合於桃水

泗源水在龍南縣西北二十里源出峰門犁壁山合上

平嶺鷄嶺窰坑諸水至寫口溪入三江口合流而下
潮水在石城縣北源出遙嶺流至縣北門與琴水合西
流歷三門灘龍灘迴龍灘至大潄塘合寧都梅水

長橋水在石城縣西受福建寧化分流之水五里至亨
田與橫江水合又有賴家畹水由浮嶺界流入寧都
仙嶺水在定南縣北四十五里會下歷楊梅等水流入
九洲河合安遠水入三溪口抵廣東龍川界

鹹水在定南縣北八十里源出南坑諸山流鹹湖會龍

南桃水

油潭水在定南縣東二十里東流入廣東和平縣下車

河

河嶺水在長寧縣南十里又縣東五十里有尋鄔保水
流入廣東龍川縣之赤石渡

清溪在府城北長興鄉發源萬安南界之分水嶺經田
村抵勞田至魁星橋東注潁江

禾溪在雩都縣東北源出九山嶂合水頭水至率口入

貢水

龍變溪在寧都縣西北一里源出黃干嶺由蓮花白茅峰下經響石會小桃源度化水至見龍橋遶城北與梅江小溪江合亦稱三江口

璜溪在寧都縣南三十里流自梅川形如半壁世傳溪水有聲如觸玉璜即出名賢明成化己丑董文僖越應之

秋溪在石城縣南源出福建汀州界流合縣前大溪

蛟湖在興國縣南門外春口埧之陰與靈湖相連世傳
中有巨魚食之多禍

潮湖在寧都縣迎旭門外一日三潮其沙如灰

龍湖在瑞金縣藍田山頂清澈如鏡旁有崖石雖盛暑
亦寒慄中有龍穴鄉人遇旱禱此

龍鐘潭在雩都縣東南舊傳吳王芮遣將軍蕭武往盤
古山取鐘過此舟覆鐘沒潭底漁父時或見之岸上
有將軍廟今廢縣東北有龍窟潭在青塘南里舊有

清真殿塑玉帝像以鎮龍窟背通一竅吐氣濛濛下
深百尋人墜絲探之不可窮

烏村潭在信豐縣東四十里懸崖飛瀑三級而下聚為
一坎復結石穴流出作潭濶二丈許

仙女潭在興國縣北二十里而近潭廣數丈極望無際
水懸注疾下有石承之作瀑布三疊而後至潭其色
黝黑相傳神物居之禱雨必應東崖稍卑西崖高數
十仞石竇累累相綴屬如大瓮側立者以百計舊名

百間房知縣張尚瑗易名重甌鐫題東崖為文記之
縣前潭在瑞金縣宣文門外文廟以此潭為外泮池或
云潭內曾浮出一金航蓋亦蜃樓變幻耳

肥潭在龍南縣東南八十里濶二丈許深數尺產肥魚
無骨而味佳今潭已涸

燕數潭在石城縣西十里旁有石巖石竅境內之燕寒
冬多蟄於此魚骨磔潭在縣東七十里萬山間石巖
倒垂小潭深靚巖上飛瀑下注蔽潭口內有拳石曰

雞心禱雨者遊石上舉篙投詞須臾旋波若汲而入
既入即出緣巖上奔風雨立至

獅子潭在定南縣高砂保澄澈可以滌煩

萬礫龍泓在興國縣東九十里兩崖壁立瀑布飛下數
十丈聲如雷礫三折瀦為池廣二三畝深不測崖石
皆蒼潤挂壁松檜為虬龍形向無遊者知縣張尚瑗
搜得之有記

長信瀧在興國縣東二十五里其上之灘曰象牙羅灘

百鳥瀧上釣鈎六子豬牙其下之灘曰瀧下俗呼啞灘鵞公槎口石門獅陂自此至縣北門與減水合

石婆廟灘在瑞金縣西一里許上有石婆廟因名折而南十五里其灘曰茶壺又五里曰塔石又十里曰浮橋瀧皆灘之至險者自此入會昌界

墨斗灣在會昌縣南一百二十里源出雁門峽急流三折狀如墨斗

乾渡洲在府城東磨車灣積沙如阜洲露則知諸灘水

涸故名相近有洲曰藍凝

烏石洲在雩都縣西北十里俗傳洲上浮沙丈餘隱約見山川城郭之狀人或平之復浮出名曰烏石沙圖又雩峽中有米沙洲志勝云洲長二百餘丈其沙三角與常沙異色最白人視其厚薄以占米價低昂

瑞洲在興國縣東門外潏江東來潏水北注此洲間之識云瑞洲過縣前平川出狀元今為洪水所衝傾圯曰甚

雙魚洲在寧都縣南一里浮臥江中如遊魚狀巨浸不沒今建畫錦亭於其上

鳳凰池在府治東南二里池中有石竹舊傳有鳳棲其上宋寶慶丁卯州守聶子述構亭扁曰鳳凰池前明建謝桓慤祠今為關廟又金鯽池在贛州衛後宋州守柴中行趙時逢相繼開拓元末廢為民居明景泰正德嘉靖間三復之而寢失其故處嘶馬池在府城通利坊宋州守聶子述建堂扁曰人傑地靈歲久湮

沒明正德間知府邢珣請復之嘉靖間贛撫陸穩檄
太守黃宸重為開濬

硯池在贛縣學門內以洗硯為名歲久湮塞明宣德間
縣丞趙鼎修學因復之

瑞蓮池在雩都縣西二百步產異蓮其葉曰雙卷劍脊
其花曰雙頭丫髻三萼二十四葉其實曰覆鐘金鋌
俗謂雩山倒影所致移之他處輒如常種

鴨公池在信豐縣孝義坊寶塔寺左識云鳳凰來宴鴨

公池即此

洗藥池在興國縣治平觀前晉葛洪結菴鑿此有偈云
洞陰冷冷風佩清仙居永劫花木長榮

愛蓮池寧都縣有三一在縣署思莊樓下一在清軍廳
後一在督糧廳後

廉泉在府城小南門內光孝寺西本張氏居一夕雷震
泉忽涌出以太守廉故名宋蘇軾有詩明崇禎十三
年知縣陳履忠建書院於旁刻廉泉大社文

國朝順治十年賴撫劉武元因濂溪書院久廢改建於此

洗心泉在興國縣金斗山廬禪巖前

靈泉在寧都縣金精山巖左畔兩巖合峙瀑布自巔飛注石臺流曲渠下入石竅中泉極清冽舊傳有仙以白玉杯飲於泉側酒闌反掌印石其杯陷入石中經寸明弘治間知縣怪而鑿之遂缺杯底一角歷今猶存其靈異如此

蒙泉在寧都縣西九里官人山泉自蒙巖下流白如曳線其右一泉積澌不竭名裒泉又縣西北三十里有白石泉白石罅溢出如縷寒冽甘美可辟煩悶

平章泉在會昌縣學宮內泉甚清冽有大石覆之明崇禎己卯因浚井得一磚上鐫平章泉飲必中神農記
九字

濂泉在安遠縣靈寶觀後澄泓清冽為境內第一泉
溫泉有十五在信豐會昌長寧者各一在寧都安遠者

各二在龍南者三在石城者五石城又有熱水湖湯湖

陸公泉在瑞金縣西南東明觀前宋大觀中太常少卿陸蘊坐議原廟不合謫瑞金令與弟藻同遊此烹茶淪茗有軒前山色依然翠溜下泉聲漱玉寒之句後召還邑人遂以陸公名泉舊志誤以藻兄弟為唐人今據宋史改正

獅子井在府治前通衢左右地識云穿開獅子兩條泉

宋時湮沒州守柴中行復之右井廢明正德間知府
邢珣開浚又府治東坊江東廟前靈泉井烹茶味佳
兼可愈疾

三潮井在府治興賢門內崇真堂其水每日三潮滿溢
井口明崇禎己後潮信竟不復至

知味井在雩都縣紫陽觀內舊傳泉味甘酸異日宋洪
邁有詩明詹孟舉扁其亭曰知味

鳳凰井在信豐縣奉真觀右舊云水脈通石鼓潭出五

色金鯉其種今絕劉婆井在縣西竹橋河里許相傳
宋時有神僧因母劉病渴卓錫而泉出雖大旱不竭
銅鑼井在興國縣彭屋廟後井口懸崖下空汲之聲響
如銅鈺故名

玉泉井在寧都縣按察司行署內又縣署獄內有鹹水
井形家謂縣肖蛇此二井為蛇眼宜常疏濬

龍湫井在安遠縣西四十里上龍山泉水清冽
銅鼓井在長寧縣南門之東又南門外有迴龍井

江西通志卷十三